



4. marts 2016

UPA 2016/51

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiuppara:

**Illumik pisinermut atatillugu illup qanoq innera pillugu naliliinermik sanasoqartalernissaanut inatsisitigut piumasaqaateqartalernissamut atatillugu aningaasatigut iluaqutissanik ajoqutaasunillu misissuisoqarnissaa pillugu kiisalu illumik pisinermut atatillugu illut nukimmik atuisarnerat pillugu nalunaaqutsiisarnissap inatsisitigut piumasaqaataalernissaanut atatillugu misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aamma misissuinermi ilanngullugu paasiniaqquneqarpoq sillimmasiisarfiit piginnittut nikinneranni suleqataanissaminnut piumasaqaatigisinnaasaat kissaataallu. Misissuinerup innera Inatsisartunut agguanneqassaaq 2017-imi ulloq 1. januaari tikitsinnagu.**  
(Inatsisartunut ilaasortaq Justus Hansen, Demokraaterne)

**Tunngavilersuut:**

Illup qanoq issusia pillugu nalunaarsuineq tassaavoq illup ilinniarsimasumit nalilersornera illut allat taamatut pisoqaassusillit tunngavigalugit. Akorngutit ersittut nalunaarsorneqassapput, illup atorsinnaasusaanik akorngusiisut imaluunniit malunnaatilimmik illumik nalikinnerulersitsisut. Aamma ajoqutit allat imaluunniit illup pissusaata qanoq innera takussutissinneqassapput ersersinniarlugu tamakku kingorna illumut akorngutinngorsinnaanersut. Nunami maani oqummik ajornartorsiuteqarnerput tunngavigalugu aamma illup isungutanera nalunaarsuinermut ilanngunneqartariaqarpoq.

Illup qanoq issusaa pillugu nalunaarsuineq allatut oqaatigalugu uppersaataassaaq pisisup nalilersuinermini iluaqutigisinnaassaa, paasiniarlugu illu pisiariniarlugu piareersimanerluni.

Demokraatini tunngaviummik isumaqarpugut pitsaassasoq ilaqtariinnut illup qanoq issusaa pillugu nalunaarsuisarnissaaq inatsisitigut piumasaqaataalersuuppat, pisisup takusinnaalerniassammagu illumi suut ajoqutaanersut amingaataanersullu.

Demokraatinili taamaakkaluartoq isumaqarpugut aallaqqaammut misissorneqartariaqartoq illunik nioqquteqarnermut atatillugu inatsisiliornissaaq sutigut iluaqutissartaqarnerasoq akorngutissartaqarnerorluunniit. Taamaattumik kissaatigaarput Naalakkersuisut misissuititsissasut tamanna siunertarlugu.

Misissuinermi qulaarneqassapput illunik nioqquteqarneq qanoq annertutiginersoq aamma nioqquteqarnermut atatillugu pisortanut aningaasaqarnikkut allaffissornikkullu kingunerisassai pillugit inatsisiliornissamut misissuineq imminut akilersinnaanersoq.



Misissuinerimi aamma qulaajarneqassapput illumik nioquteqarnermut atatillugu illup qanoq issusaa pillugu nalunaarsuisarnissamut kiisalu nukimmik illup atuinera aallaavigalugu nalunaaqutsersuissalernissamut atatillugu aqqissuussinerit assigiinngitsut suut massakkut tunngavigineqartariaqassanersut inatsimmik sanasoqassagaluarpata. Matumani immikkut eqqarsaatigineqarpoq inatsisitigut piumasaaqataassanersoq, illumik nioquteqarnermi tunisisup illup qanoq issusaa pillugu nalunaarsuummik sanasalernissaa taamatullu nukimmik illup atuinera aallaavigalugu nalunaaqutsersuinerimik isumaginnitalernissaa imaluunniit iluaqutissartaqassanersoq piumasuseq tunngavigalugit tamakku suliarineqartarpata.

Misissuinissamut siunnersuummi aamma qulaajarneqartariaqarpoq iluaqutaassanersoq, inissianut tunngatillugu illup qanoq issusaa pillugu nalunaarsuisarnissaaq kiisalu nukimmik illup atuinera aallaavigalugu nalunaaqutsersuissalernissaaq inatsimmut piumasaaqatitut ilanngunneqassanersoq.

Illup qanoq issusaa pillugu nalunaarsuinerimi aningaasartuut eqqarsaatigalugit Demokraatini isumaqarpugut tunisisup tamanna tamakkiisumik akilertariaqaraa kisianni tamanna aamma misissuinerimut ilanngunneqarsinnaakuttoorpoq.

**Pisortanut aningaasaqarnikkut allaffissornikkullu kingunerisassai**

Naatsorsuutigineqarpoq misissuineq ingerlanneqarsinnaasoq Ineqarnermut Angallannermullu Naalackersuisoqarfimmut aningaasaliissutaareersut iluanni. Ilimanarpoq ilinniagartuup ukiup affaata missaani misissuinissaanut aningaasaliisoqartariaqassasoq.

**Inuussutissarsiornermut aningaasaqarnikkut allaffissornikkullu kingunerisassai**

Misissuinerimut atatillugu toqqaannartumik sunniuteqassanngilaq.

**Innuttaasunut aningaasaqarnikkut allaffissornikkullu kingunerisassai**

Misissuinerimut atatillugu toqqaannartumik sunniuteqassanngilaq.

Taamatut oqaaseqarlunga Naalackersuisut akissutissaannut kiisalu partiit allat oqaaseqaatissaannut qilanaarpunga.